



Rapport annual dil president pigl onn 2021

Cul suandont rapport sesprovel da resumar igl occurriu en nossa pleiv e da dar ina survesta sur dallas fatschentas che han occupau la suprastanza el decuors digl onn 2021.

1. Pastoraziun e cuminonza

Per la pleiv da Breil ei igl onn 2021 sesviluppau senza pli grondas surpresas a norma digl usitau. Nossa cuminonza ei stada preservada da disgrazias e catastrofas ed ha aschia astgau viver en pasch e concordia.

Nies plevon Sur Sajan ei sevivius en bein en nossa cuminonza. La dumengia, ils 14 da november 2022 ha nossa pleiv astgau celebrar festivamein, en cooperaziun culs chors baselgia e las societads da musica da Breil, Danis/Tavanasa ed Andiastr, la surdada ufficiala dalla pleiv a nies plevon Sur Sajan en preschientscha dil vicari general Jürg Stucker e dils plevons Sur Giusep Venzin, Sur Alexi Manetsch, Sur Dirk Jasinski e Ser Jan Andrea Bernard. Risquardond la situaziun actuala cun la scartezia da plevons stuein nus esser fetg engrazieivels d'haver in agen plevon, in premurau ed engaschau pastur per nossa cuminonza parochiala. Malgrad il grond e premurau engaschi da Sur Sajan seslucan las retschas tier devoziuns e survetschs divins adina pli fetg, in svilup depriment che dat da patertgar!

In radi da speranza ed indezi da prosperitad ein en quella situaziun las biaras personas engaschadas sin basa voluntaria e cun gronda premura en las differentas scharschas dalla pleiv. In grond ed apprezzau survetsch che promova e ligia ensemen nossa cuminonza.

L'integraziun dalla pleiv d'Andiastr ei sesviluppada cumpleinamein e la cooperaziun funcziuna en tuttas spartas a moda optimala. Deplorablamein ei la via da comunicaziun aunc adina buca realisada, quei ch'engrevegia ils contacts ed ei in disavantatg per tutta colaboraziun. Per nossa cuminonza parochiala repartida sin quater pleivs ein las cundiziuns d'access da grond'impurtonza, oravontut per la pastoraziun e per sentupadas ed occurrenzas communablas.

La pandemia da Corona ei semantenida vinavon egl onn 2021 ed ha procurau la prolungaziun dallas restricziuns applicadas naven dil mars egl onn 2020. Cun levgera havein nus priu encunter el decuors dil meins settember las novas reglas da conduita che han lubiu in tec dapli libertad. Da quei mument naven ei igl obligatori da maschina per sentupadas cun meins che 50 personas curdaus naven e la cooperaziun dils chors tier survetschs divins stada lubida sut la cundiziun che cantadurs/as sidentificheschien cul certificat Covid-19 ni cul corrispundent test negativ. Tier sentupadas da sur 50 personas ei vinavon stau pretendiu il certificat Covid e per affons sur 12 onns la maschina.

La pandemia da Corona e las restricziuns applicadas duront ca. 2 onns han reduciu grondamein las activitads e sentupadas da nossa cuminonza. Quei che ha pituu fetg ein ils contacts socials ch'ei duront meins ora buca stai pusseivels. In resultat ch'ei probablamein d'attribuir a quei fatg ei il grond diember d'extradas ord nossa cuminonza e Baselia catolica el decuors digl onn 2021. L'extrada da 16 personas carschidas e 2 affons survarga per bia la media dils onns precedents. In fatg che dat

da patertgar e che provochescha la damonda nua maunca ei, tgei va falliu enteifer nosa Baselgia e cuminonza? Eis ei forsa la consequenza digl individualissem che sederasa adina dapli en nosa societad e che procura era a nos chors, societads da musica e biaras uniuns in digren da commembers/as e fuorma in concret prighel d'existenza?

Cun la speranza che nosa cuminonza resti aschi bein sco pusseivel protegida da quei svilup, prendel bugen la caschun d'engraziar a tuttas e tuts, a giuven e vegl ch'ei stai involvi e s'engaschan vinavon per nosa pleiv. In cordial Dieus paghi per tut prestau. Menziun meretan era nos trapassai, vischins e vischinas che han stuiu suandar il clom da sura e bandunar nus per adina el decuors digl onn 2021.

(Sesalzar per in cuort mument da silenzi en regurdientscha da nos defuncts.)

2. Lavur da supastonza

La fusiun dallas 4 pleivs ha possibilitau la coordinaziun dalla pastoraziun ed administraziun. La nova grondezia ha denton era augumentau ils pensums e la responsabladad els differents secturs. Il quitau dil numerus diember d'objects, baselgias, capluttas, casas pervendas, schischom da construcziun e funs pretenda in grond e permanent engaschi. En connex cun 7 sedutas ha la suprastonza deliberau ils pensums adossai ad ella tenor meglier saver e puder. A caschun da duas radunonzas generalas (19.06. e 27.11.2022) ha ella informau e suttamess differentas fatschentas per approvaziun alla cuminonza da pleiv. Enteifer la suprastonza regia in bien spert ed activa cooperaziun. Pil sustegn e grond engaschi da mes consuprastonts engraziel cordialmein.

Ils pensums principals el decuors digl onn 2021 ein stai:

- La survigilonza ed il quitau da beins ed objects. Oravontut pil manteniment dallas baselgias Dardin ed Andiastr, la casa pervenda Andiastr, la renovaziun tuchiez Dardin e las preparativas per la sanaziun dalla caplutta Sogn Sievi cun la procura dalla finaziaziun e contractivas cun instanzas pertuccadas e.a.v.
- L'administraziun ed il quitau dallas finanzas
- Contractivas per dretgs da baghegiar el quartier «Ruast Breil» e la vendita d'ina parcella el quartier «Mirada» e dil clavau pervenda Andiastr.
- Preparativas per l'affitaziun da funs els vischinadis da Breil-Vitg, Dardin e Danis/Tavanasa per la nova perioda 2022-2027
- La procura per calusters/as e pedels baselgia a Breil ed Andiastr, per catechets/as e gidonters/as en differentas scharschas dalla pleiv.
- L'organisaziun dalla fiasta d'installaziun da Sur Sajan e las preparativas per l'inauguraziun dil santeri e zenn grond a Breil

3. Beins, funs ed objects

La pleiv dispona da terren enteifer la zona da construcziun. Quel vegn mess a disposiziun en dretg da baghegiar a personas che han, ni prendan dimora enteifer nosa vischnanuca. El decuors digl onn 2021 ein 3 parcelas enteifer il quartier Ruast a Breil-Vitg vegnidas surdadas en dretg a famiglias giuvnas. Quei ei ina buna ed apprezzada purschida per la realisaziun d'in agen da casa ed el medem mument era ina schanza per svilup e regiuvinaziun da nosa cuminonza da pleiv e vischnanuca. Dallas 8 parcelas el quartier Ruast ein actualmein aunc 3 libras per surdar en dretg da baghegiar. A Danis ed era a Dardin dispona la pleiv da singulas parcelas che stattan pil medem intent a disposiziun.

La nova perioda d'affitaziun dil funs dalla pleiv el vischinadi da Breil-Vitg pils onns 2022-2027 porscha la caschun per la coordinaziun dils termins e periodas d'affitaziun da funs enteifer ils 4 vischinadis. La liquidaziun da quella restonza ord la fusiun dallas pleivs simplifichescha la survegionza ed administraziun.

Las preparativas per la restauraziun dalla caplutta Sogn Sievi ein fatgas. Il consentiment digl uffeci tgira da monuments, las disposiziuns da vart da Confederaziun, Cantun e Corpus Catholicum concernent la confinaziun ein avon maun. L'execuziun dallas lavurs ei previda el decuors dalla stad 2022. En connex cun la sanaziun dalla caplutta Sogn Sievi ein era previdas singulas lavurs da manteniment vid las duas pintgas capluttas vischinontas da Sogn Gieri e da Sogn Pieder e Paul (Jert dallas ulivas)

Il di da Numnasontga, igl 1 da november 2021 ha nossa cuminonza inauguru il niev e bi santeri da Breil, renovaus e finanziaus entras la vischnaunca politica da Breil. Il medem di ei era igl anteriur zenn grond da Breil « Il Gioder » vegnius beneventaus en siu oriund liug d'acziun, suenter ina liunga assenza e dimora, dapi igl onn 1963, el museum cantunal a Cuera. Sin iniziativa privata ed en cooperaziun cun la pleiv e grazia al sustegn finzial dalla vischnaunca politica eis ei stau pusseivel da contonscher in contract d'emprest davart dalla Fundaziun dil museum Cantunal e da construir enteifer il santeri in niev suttetg pil bi e grond zenn.

4. Squard egl avegnir

Nossa pleiv ei fetg bein survida cun gl'engaschi e la lavur da nies plevon Sur Sajan. El decuors dils 3 onns vargai ha Sur Sajan fatg grond progress el lungatg romontsch ed ei s'integraus bein en la cultura e veta quotidiana da nossa cuminonza.

Quei che nus stuein aunc promover ei il contact enteifer las singulas pleivs. Cun las informaziuns els fegls ufficials, la pagina d'internet dalla pleiv stat da tut temps ina buna informaziun a disposiziun. Quei che vegn alla cuorta ei il contact persunal, caschunaus oravontut entras las restricziuns dalla pandemia. La speranza resta vinavon che la situaziun semidi e semigliuri el decuors dil proxim temps e porschi puspei la caschun da tgirar pli stretg ils contacts enteifer nossa cuminonza.

Per finir in cordial engraziament:

- A Sur Sajan per sia gronda lavur e buna cooperaziun ed oravontut pils bials survetschs divins. En quei connex in cordial engraziament a tut tgi che ha segidau cun Sur Sajan sin ina moda u l'otra.
- A nossa secretaria Petronella, allas catechetas ed a tuttas persunas engaschadas en nossa pleiv, lecturs/as e ministrants, als commembers/as dil cussegl pastoral, als calusters/as, pedels ed ugaus caplutta, agl archivar, organists, dirigents e chors baselgia.
- A mes collegas consuprastonts pil grond sustegn e la buna cooperaziun.

La gronda gruppa da persunas engaschada en favur da nossa pleiv presta in indispensabel agid per la realisaziun dils differents survetschs a nossa cuminonza. Senza quei sustegn fussen pliras purschidas buca pusseivlas ed il survivor da nossa pleiv a liunga vesta periclitau! Cun quella perschasiun siarel miu rapport cul giavisch per in permanent prosperar da nossa cuminonza e la speranza sin ina fritgeivla cooperaziun futura.

Breil, miez mars 2022, SC